

Botschaft an Kantonsrat

Begrüssung (Autorin: Sarah Camenzind)

Guete Morge gschetztzi Parlamentarier und Parlamentarierinne. Danke das ier üs hie ziit, Ghör und Gipfeli schenkid und denn no e so früeh am Morge. S'Elektrizitätswärch vom Bezirk Schwyz hett üs alli vor de Herbschtferiä zu unterschiedliche Energieexkursionen iiglad. Mier Schüeler vom Rothethurm hend i dä Kehrchtverbrännigsalag glehrt, gmerkt und gschmückt dass sogar Güsel en Energiequelle isch. Wäg der Energie hend mier Junge üs nebed de Schuelzeit im Rahme vom 3.Forum Jugend und Energie au später wieder troffe. Det hemmer eisch gröbers drüber nachedenkt und diskutiert wes um üsi Energie stahd. Und damit meinid mer eisch nid Energydrinks. Nei. Mier sind hie d Vertreter vo acht Schuele. De Mittelpunkt-Schuele vum Bezirk Schwyz und em KKS. Mier hüttige Junge sind d'Erwachsene vo more. Mier mönd i nes paar Jahre mit dem was hütt passiert lebe chönne. Und wenn das alles e so bliibt wes bis jetzt isch, wirds de nid gad „easy“ sii. Drum mues morn öppis degege passiere, no besser wer halt hütt scho.

Also mier drüü Fraue hie sind d'Anja vum KKS, vo de Mps Unteriberg d'Regula und ich bi d' Sarah vo de Mps Rothethurm. D' Männer chamer bi üs leider mit em Feldstecher goge sueche, da sie lieber im Hindergrund schaffid. Mier probierid hütt Ihne üsi Gedanke und Wünsch um Energiepolitik nöcher z bringe und hoffid fescht uf üch. Es würd üs halt scho no choge guet gfalle wenn nach hütt endlich eisch öppis passiert und nid nome alli devo redid will rede chönd mier Junge selber guet gnueg, we es paar Lehrer i de Schuel sicher scho feschtgestellt hend. Guet d'Anja redet nacher meh über üsi Wünsch a de Kantonsrat und denn d'Regula über d'Möglichkeit i Eigeverantwortig vo üs normale Bürger. Also de übergib ich jetzt s Wort ah de Regula, für das was Junge vo hütt i Sache Energie scho machid.